

**BOSNA I HERCEGOVINA**  
*Konkurencijsko vijeće*



**БОСНА И ХЕРЦЕГОВИНА**  
*Конкуренијски савјет*

**Rješenje**

**po Prijavi namjere koncentracije privrednog subjekta Arcelor Netherlands B.V.,  
Kraljevina Nizozemska, i privrednog subjekta OFZ, a.s., Slovačka Republika**

**Sarajevo**  
**januar 2008. godine**



Broj: 01-06-26-045-13-II/07  
Sarajevo, 30. januara 2008. godine

Na osnovu člana 25. stav (1) tačka e), člana 42. stav (1) tačka d) i člana 43. stav (2), a u vezi s čl. 12., 14., 16., 17. i 18. Zakona o konkurenciji («Službeni glasnik BiH», br. 48/05 i 76/07), po Prijavi namjere koncentracije privrednog subjekta Arcelor Netherlands B.V., Eemhavenweg 70, 3089 KH Rotterdam, Kraljevina Nizozemska, i privrednog subjekta OFZ, a.s., Istebné 027 53, Slovačka Republika, podnesenu po Preduzeću za konsalting i usluge Karanović & Nikolić, Gundulićeva 4, 78000 Banja Luka, Bosna i Hercegovina, zaprimljenu dana 13. decembra 2007. godine pod brojem: 01-06-26-045-II/07, Konkurencijsko vijeće, na 59. (pedesetdevetoj) sjednici održanoj dana 28. i 30. januara 2008. godine, je donijelo

### **R J E Š E N J E**

1. Ocjenjuje se dopuštenom koncentracija na tržištu prodaje legura željeza (ferolegure) u Bosni i Hercegovini koja nastaje sticanjem kontrole privrednog subjekta Arcelor Netherlands B.V., Eemhavenweg 70, 3089 KH Rotterdam, Kraljevina Nizozemska, nad privrednim subjektom OFZ, a.s., Istebné 027 53, Slovačka Republika.
2. Ovo Rješenje o koncentraciji se upisuje u Registar koncentracija.
3. Ovo Rješenje je konačno i bit će objavljeno u «Službenom glasniku BiH», službenim glasilima entiteta i Brčko Distrikta Bosne i Hercegovine.

### **O b r a z l o ž e n j e**

Prijava namjere koncentracije (u daljem tekstu: Prijava) privrednog subjekta Arcelor Netherlands B.V., Eemhavenweg 70, 3089 KH Rotterdam, Kraljevina Nizozemska (u daljem tekstu: podnosilac Prijave ili Arcelor Netherlands), i privrednog subjekta OFZ, a.s., Istebné 027 53, Slovačka Republika (u daljem tekstu: OFZ), podnesena od Sonje Stamenić (JMB 2505979105039 Garsije Lorke 3, 78000 Banja Luka), Poduzeće za konsalting i usluge Karanović & Nikolić, Gundulićeva 4, 78000 Banja Luka, Bosna i Hercegovina, dana 13. decembra 2007. godine, a zaprimljena od Konkurencijskog vijeća dana 17. decembra 2007. godine pod brojem: 01-06-26-045-II/07.

Konkurencijsko vijeće uvidom u dostavljenu Prijavu utvrdilo je da ista nije kompletna, u smislu člana 30. Zakona o konkurenciji (u daljem tekstu: Zakon) i čl. 8. 9. i 10. Odluke o načinu podnošenja prijave i kriterija za ocjenu koncentracija privrednih subjekata («Službeni glasnik BiH», broj 95/06) te je u skladu s članom 31. st. (1) i (2) istoga Zakona zatražilo dopunu iste (akt broj: 01-06-26-045-1-II/07 dana 20. decembra 2007. godine; akt broj: 01-06-26-045-3-II/07 dana 28. decembra 2007. godine, akt broj: 01-06-26-045-4-II/07 dana 03. januara 2008. godine, broj: 01-06-26-045-6-II/07 dana 04. januara 2008. godine).

Podnosilac Prijave u skladu s zahtjevima Konkurencijskog vijeća dopunio je Prijavu nedostajućom dokumentacijom (podnesak broj: 01-06-26-045-2-II/07 dana 28. decembra 2007. godine; broj: 01-06-26-045-5-II/07 dana 04. januara 2008. godine; akt broj: 01-06-26-045-7-II/07 dana 09. januara 2008. godine, broj 01-06-26-045-8-II/07 dana 15. januara 2008. godine; broj: 01-06-26-045-9-II/07 dana 15. januara 2008. godine; broj: 01-06-26-045-10-II/07 dana 18. januara 2008. godine).

Uvidom u svu dostavljenu dokumentaciju Konkurencijsko vijeće je utvrdilo Prijavu kompletnom i izdalo Potvrdu o prijemu kompletne i uredne Prijave, u skladu s članom 30. stav (3) Zakona, dana 18. januara 2008. godine broj: 01-01-26-045-11-II/07.

Konkurencijsko vijeće u postupku ocjene dopuštenosti predmetne koncentracije je utvrdilo sljedeće činjenice:

Podnosilac Prijave je podnio Prijavu u vremenskom roku od 8 (osam) dana od dana zaključivanja Ugovora o kupovini dionica i budućoj asignaciji (preuzimanju) potraživanja između privrednog subjekta OFZ i privrednog subjekta Arcelor Netherlands, u smislu člana 16. stav (1) Zakona, te se ista smatra podnesenom u Zakonom predviđenom vremenskom roku.

Podnosilac Prijave je naveo, u smislu člana 30. stav (2) Zakona, da je podnio zahtjev za ocjenu predmetne koncentracije Komisiji za zaštitu konkurencije Republike Srbije, tijelu za konkurenciju Evropske komisije i Antimonopolskoj kancelariji Republike Ukrajine.

## **1. Učesnici predmetne koncentracije**

Učesnici koncentracije su privredni subjekt Arcelor Netherlands B.V., Eemhavenweg 70, 3089 KH Rotterdam, Kraljevina Nizozemska, i privredni subjekt OFZ a.s, Istebné 027 53, Slovačka Republika

### **1.1. Privredni subjekt Arcelor Netherlands**

Privredni subjekt Arcelor Netherlands B.V., Eemhavenweg 70, 3089 KH Rotterdam, Kraljevina Nizozemska, registrovano u Privrednoj komori Roterdama, pod brojem: 33297298, dana 12. novembra 1997. godine.

Privredni subjekt Arcelor Netherlands je zavisno društvo privrednog subjekta ArcelorMittal, Luksemburg (matično privredno društvo ArcelorMittal Grupe). Privredni subjekt ArcelorMittal vlasnik je 99,8% dionica privrednog društva Arcelor Luxembourg S.A. (Avenue de la Liberte 19, L-2930 Luxemburg, Veliko Vojvodstvo Luxemburg), registrovan u Trgovačkom sudu pod brojem: B 6990, koje posjeduje 100,0% vlasničkog udjela u privrednom subjektu Arcelor Netherlands.

Privredni subjekt ArcelorMittal, nastao spajanjem privrednog subjekta Arcelor, Rotterdam, Kraljevina Nizozemska i privrednog subjekta Mittal Steel Company, u 2006. godini, je vodeći svjetski proizvođač čelika i proizvoda od čelika, i djeluje u šezdeset zemalja svijeta (Evrope, Azije, Afrike, Amerike). Privredni subjekt ArcelorMittal, u 2006. godini, je proizveo 118 miliona tona čelika, što predstavlja do 10,0% ukupne svjetske proizvodnje.

Konkurencijsko vijeće je Rješenjem (broj: 01-03-26-018-20-II/06 od dana 18. april 2007. godine) ocijenilo dopuštenom koncentraciju na tržištu proizvoda od čelika u Bosni i Hercegovini nastalu sticanjem većinskog udjela u privrednom subjektu Arcelor S.A., 19 Avenue de la Liberte, L-2930

Luxembourg, Veliko Vojvodstvo Luksemburg od strane privrednog subjekta Mittal Steel Company N.V. Hofplein 20, 3032AC Rotterdam, Kraljevina Nizozemska.

### **1.1.1. Povezana privredna društva u Bosni i Hercegovini**

#### **1.1.1.1. Privredni subjekt Mittal Steel Zenica**

Privredni subjekt Mittal Steel Zenica d.o.o., Bulevar Kralja Tvrtka I broj 17., 71000 Zenica (u daljem tekstu: Mittal Steel Zenica) registrovan je u Opštinskom sudu u Zenici, pod brojem: 1-7460 dana 29. novembra 2005. godine. Privredni subjekt Mittal Steel Holding AG, Alpenstrasse 15, 6304 Zug, Švicarska Konfederacija ima u 100,0% vlasništvu privredni subjekt Mittal Steel Zenica.

Osnovne registrovane djelatnosti privrednog subjekta Mittal Steel Zenica su vađenje rude željeza, proizvodnja sirovog željeza, čelika i ferolegura, proizvodnja lijevanih željeznih i čeličnih cijevi, valjanih žica i proizvoda od žice, reciklažu metalnog otpada, proizvodnja mašina opšte namjene za metalurgiju, trgovinom na veliko metalima i rudama i slično.

Tržišni udio (Prema podacima iz Prijave za 2006. godinu) u Bosni i Hercegovini privrednog subjekta Mittal Steel Zenica u proizvodnji čelika i proizvoda od čelika je 93,0%, dok 7,0% je uvoz iz Republike Turske, Republike Ukrajine itd.

Privredni subjekt Mittal Steel Zenica nema distributivnu mrežu u Bosni i Hercegovini i najveći kupci privrednog subjekta Mittal Steel Zenice su: privredni subjekt Komerc-Mali Prnjavor, privredni subjekt Intermerkur-Sarajevo, privredni subjekt Standard EM-Kiseljak, privredni subjekt Velbos-Žepče i privredni subjekt Eurosystem BH-Tuzla.

#### **1.1.1.2. Privredni subjekt Mittal rudnici Prijedor**

Privredni subjekt Mittal rudnici Prijedor d.o.o., Akademika Jovana Raškovića 1, 52000 Prijedor (u daljem tekstu: Mittal rudnici Prijedor), registrovan na Osnovnom sudu u Banja Luci, pod brojem: 1-14600-00, dana 12. avgusta 2004. godini. Osnivači privrednog subjekta Mittal rudnici Prijedor su privredni subjekt Mittal Steel AG, Alpenstrasse 15, 6304 Zug, Švicarska Konfederacija sa vlasničkim udjelom od 51,0% i privredni subjekt RŽR Ljubija d.d. Prijedor, Akademika Jovana Raškovića 1, 52000 Prijedor, sa vlasničkim udjelom od 49,0%.

Osnovne registrovane djelatnosti privrednog subjekta Mittal rudnici Prijedor su vađenje rude željeza, kamena, krečnjaka, krede, šljunka, pijeska, minerala za proizvodnju mineralnih prirodnih goriva, trgovinom na veliko metalima i rudama metala i slično.

Cjelokupna proizvodnja privrednog subjekta Mittal rudnik Prijedor se prodaje u okviru Grupe Arcelor Mittal, kompanijama u Republici Poljskoj, Republici Rumuniji i Češkoj Republici.

Privredni subjekt Mittal rudnici Prijedor je jedini aktivni rudnik željezne rude u Bosni i Hercegovini (rudnik u željezne rude u Varešu nije u funkciji).

## **1.2. Privredni subjekt OFZ**

Privredni subjekt OFZ a.s, Istebné 027 53, Slovačka Republika, je evidentiran u privrednom registru Okružnog suda u Žilini, broj registra: 10228/L, dana 01. decembra 1999. godine.

Privredni subjekt OFZ proizvodi (distribuirati i prodaje) širok asortiman legura željeza (legure željeza se proizvode miješanjem željeza i jednog ili više drugih metala /krom, mangan magnezij, silicij/ i koriste se u proizvodnji čelika) što predstavlja 96,0% ukupnog ostvarenog prihoda u 2006. godini, dok 4,0% prihoda se odnosi na žičane odlijevke.

Privredni subjekt OFZ proizvodi ferrosilicon (koristi se u deoksidaciji svih vrsta čelika), feromagan (koristi se za deoksidaciju čelika i legura) i ferrosilikonski mangan (koristi se u proizvodnji čelika za deoksidaciju).

Privredni subjekt OFZ nema u vlasništvu (pojedinačno ili zajedno) 10,0% ili više udjela u osnovnom kapitalu, ili 10,0% ili više glasačkih prava u nekom privrednom subjektu u Bosni i Hercegovini.

## **2. Pravni okvir ocjene koncentracije**

Konkurencijsko vijeće u postupku ocjene dopuštenosti predmetne koncentracije primjenilo odredbe Zakona, Odluke o utvrđivanju relevantnog tržišta (Službeni glasnik BiH, broj 18/06), te Odluke o načinu podnošenja prijave i kriterija za ocjenu koncentracija privrednih subjekata.

Također, u smislu člana 43. stav (7) Zakona, koristilo je kriterije i standarde iz Uredbe Vijeća (broj: 139/2004) o kontroli koncentracije između privrednih subjekata, Obavjest Komisije o konceptu koncentracije privrednih subjekata i Smjernice za ocjenu horizontalnih /vertikalnih koncentracija.

## **3. Pravni osnov i oblik koncentracije**

Konkurencijsko vijeće je utvrdilo Ugovor o kupovini dionica i budućoj asignaciji (preuzimanju) potraživanja između privrednog subjekta OFZ a.s., i privrednog subjekta Arcelor Netherlands B.V. (u daljem tekstu: Ugovor), potpisan dana 05. decembra 2007. godine, kao pravni osnov predmetne koncentracije, u smislu člana 30. stav (1) Zakona. Predmetnim Ugovorom (ukupna transakcija iznosi (...)\*<sup>1</sup> KM /EUR (...)\*) privredni subjekt Arcelor Netherlands namjerava steći 100,0% vlasničkog udjela u privrednom subjektu OFZ Široká.

Privredni subjekt OFZ je osnovao (i ima 100,0% vlasništvo) privredni subjekt OFZ Široká, a.s., Oravský Podzámok 381, 027 41, Slovačka Republika (u daljem tekstu: OFZ Široká), identifikacioni broj: 43 812 791, registar Trgovačkog regionalnog suda broj: 10612/L, sa osnovnim kapitalom od 58.000,00 KM (SKK 1.000.000,00). Privredni subjekt OFZ Široká će obavljati, između ostaloga, poslove proizvodnje, marketinga, prodaju i distribuciju legura željeza, koje je ranije obavljao privredni subjekt OFZ.

Prema Ugovoru privredni subjekt OFZ sve dionice u privrednom subjektu OFZ Široká prodat će privrednom subjektu Arcelor Netherlands, koji će nakon provedene transakcije steći potpunu kontrolu nad privrednog subjekta OFZ odnosno poslovima u vezi legura željeza.

---

<sup>1</sup> (...)\* - podatak predstavlja poslovnu tajnu, u smislu člana 38. Zakona o konkurenciji

Pravni oblik predmetne koncentracije je sticanje direktne kontrole privrednog subjekta Arcelor Netherlands (kupovina svih dionica) nad privrednim subjektom OFZ, u smislu člana 12. stav (1) tačka b) pod 1) Zakona.

#### 4. Obaveza podnošenja prijave namjere koncentracije

Ukupni godišnji prihodi privrednih subjekata učesnika predmetne koncentracije, na dan 31. decembra 2006. godine, iznose:

Tabela 1.

	Arcelor Netherlands		OFZ	
	KM	EUR	KM	EUR
<b>Svijet</b>	(..)*	(..)*	(..)*	(..)*
<b>Bosna i Hercegovina</b>	(..)*	(..)*	(..)*	(..)*

Ukupni zajednički godišnji prihodi učesnika predmetne koncentracije (Tabela 1.) iznose preko (..)\* KM odnosno privredni subjekt Arcelor Netherlands je ostvario (..)\* KM dok privredni subjekt OFZ je ostvario (..)\* KM, po završnom računu u godini koja je prethodila predmetnoj koncentraciji. Budući da su učesnici koncentracije, u smislu člana 14. stav (1) tačka a) Zakona, ispunili uslov ostvarenog zajedničkog ukupnog prihoda te uslov da najmanje jedan privredni subjekt učesnik koncentracije je registrovan na teritoriji Bosne i Hercegovine (subsidijska društva ArcelorMittal– Mittal Steel Zenica i Mittal rudnici Prijedor) podnosilac Prijave je obavezan podnijeti Prijavu.

Ukupan godišnji prihod učesnika koncentracije (Tabela 1.) predstavlja prihod (bez poreza na dodanu vrijednost i drugih poreza koji se direktno odnose na učesnike koncentracije, na svjetskom i na tržištu Bosne i Hercegovine, u smislu člana 8. tačka h) predmetne Odluke.

#### 5. Relevantno tržište

Relevantno tržište, u smislu člana 3. Zakona, te čl. 4., 5. i 6. Odluke o utvrđivanju relevantnog tržišta («Službeni glasnik BiH», broj 18/06), čini tržište određenih proizvoda /usluga koje su predmet obavljanja djelatnosti na određenom geografskom tržištu.

U skladu s odredbama člana 4. Odluke o utvrđivanju relevantnog tržišta u proizvodnom smislu, relevantno tržište proizvoda obuhvaća sve proizvode i/ili usluge za koje potrošači smatraju da su međusobno zamjenjivi s obzirom na njihove bitne karakteristike, cijenu ili način upotrebe.

Nadalje, prema članu 5. Odluke o utvrđivanju relevantnog tržišta, relevantno tržište u geografskom smislu obuhvaća cjelokupan ili dio teritorija Bosne i Hercegovine, na kojem se tržišni konkurenti natječu u prodaji i/ili nabavci proizvoda pod jednakim ili dovoljno ujednačenim uslovima koji to tržište bitno razlikuje od susjednih tržišta.

Slijedom navedenoga relevantno tržište proizvoda predmetne koncentracije obuhvaća tržište prodaje legura željeza dok relevantno geografsko tržište obuhvaća prostor Bosne i Hercegovine.

Konkurencijsko vijeće pri utvrđivanju relevantnog tržišta je utvrdilo da privredni subjekt ArcelorMittal ne ostvaruje prihode na tržištu legura željeza u Bosni i Hercegovini dok privredni subjekt OFZ isključivo ostvaruje prihod na tom tržištu te ne postoji horizontalno preklapanje između učesnika koncentracije.

U procjeni relevantnog tržišta u obzir je uzeto da učesnici koncentracije, i na svjetskom nivou, poslovno djeluju na različitim tržištima te nema horizontalnog preklapanja na tržištu legura željeza, budući da privredni subjekt ArcelorMittal ne proizvodi legure željeza.

## 6. Analiza relevantnog tržišta na svjetskom nivou

Privredni subjekt OFZ (u 2006. godine) je proizveo 146.000 MT (miliona tona) legura željeza u vrijednosti (..)\* miliona KM ((..)\*miliona EUR) što predstavlja oko (..)\*% tržišnog udjela na svjetskom nivou, u 2006. godine (ukupna proizvodnja se procjenjuje na 58,67 milijardi KM (30,0 milijardi EUR) odnosno oko 27 MT – miliona tona.

Struktura proizvodnje legura željeza (uključuje proizvodnju svih legura željeza) po zemljama i tržišni udjeli (procjena) u 2005. godini:

Tabela 2.

Rb	Zemlja	Proizvodnja legura željeza	Postotak %
1.	Kina	10.600.000 MT	39,7%
2.	Južna Afrika	3.650.000 MT	13,67%
3.	Ukrajina	1.720.000 MT	6,44%
4.	Rusija	1.690.000 MT	6,33%
5.	Kazahstan	1.539.537 MT	5,77%
6.	Brazil	1.202.433 MT	4,50%
7.	Indija	1.030.000 MT	3,86%
8.	Japan	963.218 MT	3,61%
9.	Norveška	870.000 MT	3,26%
10.	Ostale zemlje	3.434.812 MT	12,86%
	UKUPNO	26.700.000 MT	100,0%

Izvor: U.S. Department of the Interior - U.S. Geological Survey Minerals Yearbooks-2005

Prema podacima (Tabela 2.) najveći svjetski proizvođač legura željeza je Narodna Republika Kina sa tržišnim udjelom od 39,7%, Južna Afrika sa tržišnim udjelom od 13,67 i Ukrajina sa tržišnim udjelom od 6,44%.

Privredni subjekt OFZ ostvaruje prihode prodajom legura željeza kompanijama u Češkoj Republici (37,93% ukupnog prihoda), Republici Poljskoj (26,17%), Slovačkoj Republici (13,48%), Republici Srbiji (5,49%), Republici Mađarskoj (4,93%), Republici Italiji (3,56%), Saveznoj Republici Njemačkoj (3,36%), Bosni i Hercegovini (2,37%) itd.

Značajniji svjetski proizvođači /snabdjevači legura željeza su privredni subjekti: Assmang Limited (Johanesburg, Južna Afrika), Hernic (Brits, Južna Afrika), Samancor (Johanesburg, Južna Afrika), Elkem (Oslo, Norveška), Fesil (Trondheim, Norveška), Rusal (Ruska Federacija), Norilsk Nickel (Ruska Federacija), Kluchevsky Ferroalloys Plant (Ruska Federacija), Oriol Resources (Londom, Velika Britanija), Vale Inco (Toronto, Kanada), Falconbridge (Montreal, Kanada), ZILIN Ferroalloys Group Corp (Kina), Erdos Xijin Kuangye (Kina), Aksuiskiy Ferroalloys Plant (Kazahstan), Nikopol Ferroalloys Plant (Ukrajina), Zaporozhye Works (Zaporozhye, Ukrajina), Chrome Corporation Limited (Perth, Australija), Brazil's Prometal Produtos Metalúrgicos (Brazil).

Privredni subjekt OFZ 34,67% ukupne proizvodnje legura željeza (oko 50.5 MT), u 2006. godini je isporučio privrednom subjektu ArcelorMittal (njegovim subsidijarnim privrednim subjektima u Republici Češkoj i Republici Poljskoj), koji su korišteni za proizvodnju polu-gotovih proizvoda od čelika (u toj fazi legure željeza se koriste za proces proizvodnje čelika).

Privredni subjekt ArcelorMittal na svjetskom tržištu polu-gotovih proizvoda od ugljanog čelika ima tržišni udio oko 19,0%, odnosno na tržištu sirovog neobrađeno željezo do 15,0%.

## **7. Analiza relevantnog tržišta na nivou Bosne i Hercegovine**

U analizi relevantnog tržišta Bosne i Hercegovine Konkurencijsko vijeće je koristilo podatke iz Prijave i Uprave za nedirektno oporezivanje Bosne i Hercegovine (Bana Lazarevića bb, 78000 Banja Luka).

Bosna i Hercegovina u 2006. godini uvezla je legura željeza (oznaka tarifne grupe 7202) ukupne vrijednosti 11.095.111,73 KM. Privredni subjekt OFZ u uvozu legura željeza u Bosni i Hercegovini ima udio od (...) \*% ((...)\* KM), dok 62,28% ostvaruju proizvođači iz Republike Makedonije (14,93%), Republike Slovenije (14,14%), Narodne Republike Kine (14,01%), Kraljevine Švedske (3,82%), Republike Poljske (2,91%) i ostale zemlje (12,47%).

Privredni subjekt OFZ nema distributivnu mrežu u Bosni i Hercegovini i najveći kupac legura željeza je privredni subjekt Mittal Steel Zenica.

U Bosni i Hercegovini legure željeza proizvodi i privredni subjekt Elektrobosna d.d. Jajce Brune Bušića bb, 70101 Jajce (kapacitet 15.000 tona ferosilicija), koji je u većinskom vlasništvu privrednog subjekta Metalleghe Spa, Republika Italija, gdje i izvozi svoje proizvode.

## **8. Procjena predmetne koncentracije**

Predmetna koncentracija je ex-teritorijalna budući da je ista ima uticaj na tržištu Bosne i Hercegovine preko djelovanja registrovanih subsidijarnih privrednih subjekata ArcelorMittal (Mittal Steel Zenica i Mittal rudnici Prijedor) i prodajom proizvoda iz asortimana učesnika predmetne koncentracije.

Konkurencijsko vijeće je analiziralo uticaj predmetne koncentracije na relevantnom tržištu, u smislu člana 17. Zakona, te utvrdilo da neće doći do promjene tržišnih udjela učesnika koncentracije niti će provođenje koncentracije spriječavati, ograničavati ili narušavati tržišnu konkurenciju na relevantnom tržištu Bosne i Hercegovine.

Prema podacima iz Prijave provođenjem predmetna koncentracija osigurat će se bolje snabdjevanja legurama željeza privrednog subjekata ArcelorMittal u Centralnoj i Istočnoj Evropi te smanjiti troškove proizvodnje čelika.

Na svjetskom nivou na tržištu proizvodnje željeza /čelika nastavlja se trend kontinuiranog horizontalnog /vertikalnog integrisanja /povezivanja privrednih subjekata, koji djeluju na različitim nivoima lanca proizvodnje, u koje spada i ova koncentracija.

Slijedom navedenoga Konkurencijsko vijeće ocijenilo dopuštenom provođenje predmetne koncentracije, u smislu člana 18. stav (2) pod a) Zakona.

## **9. Administrativna taksa**

Na ovo Rješenje podnosioc Prijave, u skladu s članom 2. stav (1) tarifni broj 107. tačka d) pod 1) Odluke o administrativnim taksama u vezi s procesnim radnjama pred Konkurencijskim vijećem



(«Službeni glasnik BiH», broj 30/06) dužnan je platiti administrativnu taksu u ukupnom iznosu od 2.500,00 KM u korist Budžeta institucija Bosne i Hercegovine.

#### **10. Pouka o pravnom lijeku**

Protiv ovoga Rješenja nije dozvoljena žalba.

Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana primitka odnosno objave ovoga Rješenja.

**Predsjednica**

**Sanja Božić**